

05/11/2000

Himpunan mencerna wadah generasi pemimpin masa depan

Haryati Maman

PEMBICARAAN Intelektual Pemuda Muslim Kebangsaan anjuran Forum Mahasiswa Sains Politik di Universiti Islam Antabangsa (UIA) minggu lalu meneroka satu aspek kepemimpinan generasi baru.

Rektor UIA, Prof M Kamal Hassan berkata, idea mengadakan majlis ilmu seperti ini memang sentiasa digalakkan.

"Ia satu idea yang boleh menghimpunkan generasi muda dari pusat pengajian tinggi di seluruh negara ke satu landasan bersama bagi menyertai majlis pembicaraan intelektual seumpama itu. Dengan itu ia boleh memperluaskan lagi tumpuan kepada perkembangan politik dan cabaran abad ke-21" katanya.

Prof Kamal berkata program itu mampu mencerna wadah penting kepada mahasiswa untuk menyalurkan pemikiran masing-masing ke arah persefahaman lebih baik bagi kepentingan bersama, lebih-lebih lagi apabila dikaitkan dengan pelbagai isu politik semasa.

Justeru, forum itu membuka peluang seluas-luasnya kepada generasi muda terpelajar untuk membincangkan isu berbangkit, kemudian membuat kesimpulan serta pendekatan intelektual serta bebas daripada ledakan emosi atau retorik semata-mata.

Pengerusi penganjur majlis itu, Mohamed Syairoz Mohd Odman menyifatkan generasi muda terpelajar sekarang sebagai pemimpin masa depan.

Bagaimanapun, katanya, kalangan itu perlu dibimbing dan diberikan landasan yang sesuai bagi mengembangkan daya kepemimpinan mereka.

Selain itu, kepemimpinan disertai panduan jitu, khususnya daripada sudut Islam akan dapat mempertajamkan lagi kualiti kepemimpinan generasi muda ke arah kualiti yang mantap.

"Apabila keadaan itu wujud, mereka akan muncul sebagai pemimpin masa depan yang berkualiti dan memiliki persefahaman dan pemikiran yang matang untuk menghadapi cabaran abad yang lebih mencabar ini," katanya.

Selain itu, katanya, majlis Pemuda Muslim Intelektual Peringkat Kebangsaan itu antara lain bertujuan memberi peluang kepada kalangan mahasiswa bertukar maklumat melalui sesi dialog yang diadakan.

Menerusi ledakan maklumat baru, katanya, mereka akan dapat membina kematangan kepemimpinan lebih mantap.

Majlis yang dilancarkan oleh Perdana Menteri, Datuk Seri Dr Mahathir Mohamad itu tidak syak lagi berjaya menggerakkan minda generasi muda pelajar, khususnya di UIA, untuk melihat ke depan dengan visi yang lebih jelas.

Percambahan idea melalui forum bertajuk Political Challenges of Future Muslim Youth in the 21st Century yang disertai Pengarah Eksekutif Pusat Penyelidikan Strategik Malaysia (MSRC), Abdul Razak Abdullah Baginda; Presiden Majlis Belia Malaysia, Saifuddin Abdullah dan Ketua Pegawai Eksekutif Akademi Belia, Dr Zambry Abdul Kadir, menjadi daya tarikan majlis ilmu yang wajar diberi sokongan oleh setiap umat Islam.

(END)